

**RAPORT PËR PROCESIN E VERIFIKIMIT NGA SEKRETARI I PËRGJITHSHËM TË
PLOTËSIMIT TË KUSHTEVE LIGJORE DHE KRITEREVE PROFESIONALE E
MORALE PËR KANDIDATËT PËR KËSHILLIN E LARTË TË PROKURORISË QË
PËRFAQËSOJNË SHOQËRISË CIVILE**

I. Hyrje

Në cilësinë e Sekretarit të Përgjithshëm dhe në zbatim të detyrimeve që më ngarkon Kushtetuta e Republikës së Shqipërisë dhe ligji nr. 115/2016 “Për organet e qeverisjes së sistemit të drejtësisë”, me vendimin nr. 2, datë 19.07.2023, në zbatim të nenit 153 të ligjit nr. 115/2016 kam vendosur shpalljen e vendeve vakante për një pozicion pranë Këshillit të Lartë të Prokurorisë që përfaqëson shoqërinë civile.

Pas ndjekjes së procedurës së verifikimit paraparak nga Komisioni i shoqërisë civile dhe marrjes në dorëzim të vlerësimit nga ana e tyre, sipas përcaktimeve ligjore kam vijuar menjëherë me verifikimin e plotësimit të kushteve ligjore të kandidatëve të cilët janë kualifikuar.

Procedura e ndjekur paraqitet hollësisht si vijon:

**II. BAZA KUSHTETUESE DHE LIGJORE E PROCESIT TË VLERËSIMIT
NGA SEKRETARI I PËRGJITHSHËM**

Neni 149 i Kushtetutës së Republikës së Shqipërisë përcakton detyrat e Sekretarit të Përgjithshëm në procesin e verifikimit të kandidatëve që plotësojnë kushtet për të qenë anëtarë në Këshillin e Lartë të Prokurorisë.

Referuar këtij neni:

“5. Sekretari i Përgjithshëm i Kuvendit, jo më vonë se 10 ditë nga paraqitja e kandidaturave, verifikon nëse kandidatët plotësojnë kushtet e parashikuara nga Kushtetuta dhe ligji, si dhe vlerëson kriteret profesionale e morale për anëtarin e Këshillit të Lartë të Prokurorisë dhe përgatit listën. Në rast se kandidatët nuk i plotësojnë kushtet dhe kriteret për t’u zgjedhur, Sekretari i Përgjithshëm i Kuvendit nuk i përfshin emrat e tyre në listë.

6. Sekretari i Përgjithshëm i Kuvendit, pas përfundimit të verifikimeve, i dërgon menjëherë listën e kandidatëve që plotësojnë kriteret formale nënkomisionit, sipas paragrafit 7 të këtij neni.”

Detyrat e Sekretarit të Përgjithshëm në këtë proces, gjithashtu, janë detajuar në nenin 35 të ligjit nr. 115/2016 “Për organet e qeverisjes së sistemit të drejtësisë”, të ndryshuar.

Sa më sipër, në nenin 35 të këtij ligji, ndër të tjera parashikohet se:

“2. Sekretari i Përgjithshëm i Kuvendit, jo më vonë se 10 ditë nga dita e paraqitjes së listës dhe dokumentacionit shoqëruar, të regjistruar sipas pikës 1, të këtij neni, verifikon, në bazë të dokumentacionit të paraqitur, nëse kandidatët plotësojnë kushtet e parashikuara nga Kushtetuta dhe neni 19 i këtij ligji. Sekretari i Përgjithshëm përjashton kandidatët, të cilët, sipas vlerësimit të tij, nuk i plotësojnë kushtet e parashikuara nga Kushtetuta dhe ky ligj.

3. Nëse dokumentacioni i kandidatit nuk është i plotë për të vlerësuar plotësimin e kushteve kushtetuese dhe ligjore, si dhe të kriterëve profesionale e morale, sipas nenit 19, pika 3, të këtij ligji, Sekretari i Përgjithshëm i kërkon kandidatit që brenda 5 ditëve të bëjë plotësimin e dokumentacionit ose paraqitjen e dokumenteve shtesë. Njoftimi për plotësimin e dokumentacionit ose paraqitjen e dokumentacionit shtesë i dërgohet kandidatit në adresën elektronike të deklaruar.

4. Mosparaqitja e dokumentacionit plotësues ose dokumentacionit shtesë në përfundim të afatit 5-ditor, nuk pezullon procesin e regjistrimit përfundimtar në Kuvend të listës së kandidatëve dhe dokumentacionit shoqërues të saj.

5. Data në të cilën plotësohet dokumentacioni i kërkuar, ose afati i përcaktuar për plotësimin, konsiderohet dhe dita e paraqitjes dhe regjistrimit të listës së kandidatëve dhe dokumentacionit shoqërues në Kuvend. Paraqitja përfundimtare dokumentohet me një numër regjistrimi nga zyra e protokollit në Kuvend.

6. Sekretari i Përgjithshëm vlerëson kriteret profesionale e morale vetëm për kandidatët të cilët plotësojnë kushtet e parashikuara nga Kushtetuta dhe ky ligj për të qenë anëtarë të Këshillit të Lartë të Prokurorisë. Vlerësimi i kriterëve profesionale e morale të kandidatëve nga Sekretari i Përgjithshëm bëhet sipas kriterëve të parashikuara në nenin 34 të këtij ligji.

7. Sekretari i Përgjithshëm, në përfundim të procedurës së parashikuar në pikat 2 dhe 6, të këtij neni, harton dokumentet e mëposhtme:

a) një listë me emrat e kandidatëve që plotësojnë kushtet e parashikuara nga Kushtetuta dhe ky ligj për të qenë anëtarë të Këshillit të Lartë të Prokurorisë;

b) një listë me emrat e kandidatëve, të cilët, sipas vlerësimit të tij, nuk i plotësojnë kushtet e parashikuara nga Kushtetuta dhe ky ligj për të qenë anëtarë të Këshillit të Lartë të Prokurorisë. Lista e kandidatëve të përjashtuar përmban emrat e tyre dhe arsyet e përjashtimit për secilin;

c) një raport me shkrim, ku vlerësohet shkalla e përmbushjes së kriterëve profesionale e morale nga secili kandidat, mbështetur në procesin e zhvilluar dhe raportin e përgatitur nga Komisioni i Pavarur Ad Hoc.

8. Kandidatët e përjashtuar njoftohen me shkrim, në mënyrë individuale dhe të arsyetuara për përjashtimin në adresën e tyre elektronike të deklaruar.

9. Sekretari i Përgjithshëm i dërgon komisionit të përhershëm përgjegjës për çështjet ligjore në Kuvend, brenda ditës së nesërme nga dita e hartimit të dokumenteve të parashikuara në pikën 7, të këtij neni, listat, së bashku me raportin e parashikuar në pikën 7, shkronja "c", të këtij neni, si dhe dokumentacionin për secilin kandidat. Listat dhe raporti bëhen publikë në faqen zyrtare të Kuvendit jo më vonë se 10 ditë pas regjistrimit të listës së kandidatëve në Kuvend.

10. Në zbatimin e detyrave të parashikuara në pikat 1 deri në 6, të këtij neni, Sekretari i Përgjithshëm mbështetet nga shërbimet e Kuvendit".

Vlerësimi dhe verifikimi i Sekretarit të Përgjithshëm të Kuvendit fillon menjëherë pas depozitimit në Kuvend të dokumentacionit dhe të listës së kandidatëve për Këshillin e Lartë të Prokurorisë nga Kryetari i Komisionit të shoqërisë civile.

III. PROCESI I VERIFIKIMIT NGA SEKRETARI I PËRGJITHSHËM TË PLOTËSIMIT TË KUSHTEVE LIGJORE SIPAS NENIT 152 TË LIGJIT NR. 115/2016 “PËR ORGANET E QEVERISJES SË SISTEMIT TË DREJTËSISË”, TË NDRYSHUAR

A. Procesi i aplikimit të kandidatëve për anëtarë të KLP-së që përfaqësojnë shoqërinë civile

Sipas përcaktimeve të nenit 153 të ligjit nr. 115/2016, jo më vonë se 4 muaj para datës së mbarimit të mandatit të anëtarit nga shoqëria civile në Këshillin e Lartë të Prokurorisë në detyrë, Sekretari i Përgjithshëm i Kuvendit shpall thirrjen për paraqitjen e shprehjeve të interesit nga kandidatët e shoqërisë civile që janë të interesuar për pozicionin e anëtarit të Këshillit.

Në zbatim të kësaj dispozite, me vendimin nr. 2, datë 19.07.2023, Sekretari i Përgjithshëm shpalli në faqen zyrtare të Kuvendit të Shqipërisë vendet vakante për një anëtar të Këshillit të Lartë të Prokurorisë që përfaqëson shoqërinë civile.

Në vijim të kësaj shpalljeje, institucionet e ngarkuara nga ligji, vijuan me procedurat përkatëse të përcaktuara në nenet 154-156 të ligjit nr.115/2016 “Për organet e qeverisjes së sistemit të drejtësisë”, të ndryshuar.

Mandati i anëtarit të Këshillit të Lartë të Prokurorisë që përfaqëson shoqërinë civile, sipas vendimit të Këshillit të Lartë të Prokurorisë nr.213, datë 13.10.2020, përfundonte në datën 18.12.2023.

B. Procedura e ndjekur nga Sekretari i Përgjithshëm pas paraqitjes së dosjeve të kandidatëve për KLP nga Komisioni i shoqërisë civile.

Bazuar në pikën 2 të nenit 155 të ligjit nr. 115/2016, Sekretari i Përgjithshëm i Avokatit të Popullit, nëpërmjet shkresës nr. 3766, datë 06.12.2023, ka përcjellë pranë Kuvendit të Shqipërisë për publikim në faqen zyrtare njoftimin publik në lidhje me kandidatët që plotësojnë kushtet ligjore për të qenë anëtarë të Këshillit të Lartë Gjyqësor dhe Këshillit të Lartë të Prokurorisë.

Në mbështetje të nenit 35 të ligjit nr. 115/2016 “Për organet e qeverisjes së sistemit të drejtësisë”, Sekretari i Përgjithshëm i Avokatit të Popullit, me shkresën nr. 1448/1 prot., datë 17.04.2024, ka bërë përcjelljen e raportit të Komisionit të shoqërisë civile, të ngritur për verifikimin paraprak të plotësisimit të kushteve ligjore të kandidatëve për Këshillin e Lartë të Prokurorisë që përfaqësojnë shoqërinë civile, ka përcjellë pranë Sekretarit të Përgjithshëm të Kuvendit të Shqipërisë, listën e 5 kandidatëve që përmbushin kriteret ligjore sipas vlerësimit të Komisionit dhe që kanë marrë pikët më të larta, si dhe listën e 6 kandidatëve që nuk plotësojnë kushtet ligjore dhe raportin e vlerësimit të kandidatëve.

Dokumentacioni i përcjellë nga Komisioni i shoqërisë civile është paraqitur pranë Kuvendit të Shqipërisë me vonesa të theksuara në raport me përcaktimet ligjore. Sipas përlllogaritjes së afateve të vendosura në ligjin nr. 115/2016, dokumentacioni duhet të ishte paraqitur në fund të muajit tetor 2023.

Gjithashtu, për çdo kandidat është përcjellë dokumentacioni përkatës mbi të cilin Komisioni ka kryer verifikimin paraprak dhe vlerësimin me pikë.

Sekretari i Përgjithshëm i Kuvendit të Shqipërisë, në zbatim të nenit 35 të ligjit nr.115/2016 “Për organet e qeverisjes së sistemit të drejtësisë”, pas depozitimit të listës së kandidatëve nga Komisioni i shoqërisë civile për anëtarë të KLP-së dhe dosjeve përkatëse, ka filluar menjëherë punën për verifikimin e plotësimit të kushteve ligjore të kandidatëve bazuar në parashikimet e Kushtetutës dhe nenit 152 të ligjit nr. 115/2016 “Për organet e qeverisjes së sistemit të drejtësisë”.

Sipas përcaktimeve të nenit të lartpërmendur, kushtet ligjore që duhet të plotësojnë kandidatët e propozuar që përfaqësojnë shoqërinë civile janë:

1. Kuvendi zgjedh 1 anëtar të Këshillit të Lartë të Prokurorisë nga anëtarët e organizatave të shoqërisë civile, të regjistruara sipas legjislacionit përkatës, të cilët punojnë në fushën e sistemit të drejtësisë ose të të drejtave të njeriut dhe që kanë zbatuar projekte në këtë fushë të paktën 5 vitet e fundit.
2. Kandidatët nga shoqëria civile duhet të plotësojnë kushtet e mëposhtme:
 - a) të jenë shtetas shqiptarë;
 - b) të kenë përfunduar ciklin e dytë të studimeve universitare për drejtësi me diplomë “Master i shkencave”, ose diplomë të njësuar me të, ose studimet universitare për drejtësi jashtë shtetit dhe të kenë marrë një diplomë të njësuar sipas rregullave për njësimin e diplomave, të parashikuara me ligj;
 - c) të kenë të paktën 15 vite përvojë pune në profesion si jurist;
 - ç) të kenë një profil të spikatur shoqëror, integritet të lartë moral dhe përgatitje të lartë profesionale në fushën e drejtësisë dhe të drejtave të njeriut;
 - d) në kohën e kandidimit të jenë të punësuar ose të angazhuar për të paktën 5 vjet, me kohë të plotë ose me kohë të pjesshme pa ndërprerje, në një organizatë të shoqërisë civile për fusha të lidhura me sistemin e drejtësisë ose të drejtat e njeriut.
 - dh) në kohën e kandidimit të mos kenë ushtruar në mënyrë aktive profesionin e avokatit për të paktën 2 vjet, me përjashtim të atyre të angazhuar në organizata ose klinika që ofrojnë ndihmën ligjore falas për funksion të organizatës;
 - e) të mos jenë kandidatë të propozuar nga avokatia ose trupa e pedagogëve të drejtësisë;
 - ë) të mos kenë qenë dënuar më parë me vendim gjyqësor të formës së prerë për kryerjen e një vepre penale;
 - f) të mos kenë mbajtur funksione politike në administratën publike ose pozicione drejtuese në partitë politike, gjatë 10 viteve të fundit përpara kandidimit;
 - g) të mos kenë qenë anëtarë, bashkëpunëtorë ose të favorizuar të shërbimeve të ish-Sigurimit të Shtetit para 2 korrikut 1991 në kuptimin e ligjit “Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë”;
 - gj) të mos jenë bashkëpunëtorë, informatorë ose agjentë të shërbimeve të inteligjencës;
 - h) në kohën e kandidimit, të mos kenë asnjë anëtar të familjes, sipas kuptimit të ligjit “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë”, si dhe të afërm të shkallës së parë që është anëtar në detyrë i Këshillit ose kandidat për anëtar.

Sekretari i Përgjithshëm i Kuvendit të Shqipërisë, në zbatim të ushtrimit të kompetencave të tij, si dhe me qëllim vlerësimin sa më korrekt dhe të mbështetur në evidenca zyrtare nga institucionet përgjegjëse dhe ligjzbatuese, parashikuar nga Kushtetuta e Republikës së Shqipërisë dhe ligji nr. 115/2016 “Për organet e qeverisjes së sistemit të drejtësisë”, i ndryshuar, gjatë fazës së verifikimit të plotësisimit të kushteve ligjore për të gjithë kandidatët që kanë aplikuar që përfaqësojnë shoqërinë civile, ka kërkuar kryerjen e verifikimeve përkatëse për 5 (pesë) kandidaturat që kanë aplikuar për Këshillin e Lartë të Prokurorisë, nga këto institucione:

- Instituti i Sigurimeve Shoqërore
- Shërbimi Informativ Shtetëror
- Autoriteti Kombëtar për Sigurinë e Informacionit të Klasifikuar
- Drejtoria e Përgjithshme e Tatimeve
- Drejtoria e Përgjithshme e Burgjeve
- Prokuroria e Përgjithshme
- Prokuroritë e rretheve
- Inspektorati i Lartë i Deklarimit dhe Kontrollit të Pasurisë dhe Konfliktit të Interesave

Me shkresën nr. 1448/2 prot., datë 25.04.2024, Sekretari i Përgjithshëm i Avokatit të Popullit, ka përcjellë pranë Kuvendit të Shqipërisë raportin alternativ të dy anëtarëve të Komisionit të shoqërisë civile në lidhje me raportin e vlerësimin për kandidatët që nuk plotësojnë kushtet dhe kriteret ligjore për të qenë anëtarë të Këshillit të Lartë Gjyqësor dhe Këshillit të Lartë të Prokurorisë nga përfaqësuesit e shoqërisë civile. Në raport pasqyrohen disa problematika të konstatuara nga dy anëtarë të këtij komisioni.

Në vijim të procesit të sipërcituar, Sekretari i Përgjithshëm, nëpërmjet vendimit nr. 5, datë 25.04.2024, vendosi: “Pezullimin e afatit të parashikuar në nenet 147 dhe 149, pika 5, të Kushtetutës së Republikës së Shqipërisë, si dhe në nenin 35, pika 2, të ligjit nr. 115/2016 “Për organet e qeverisjes së sistemit të drejtësisë” të ndryshuar, deri në vënien në dispozicion të përgjigjeve përkatëse nga institucionet e lartpërmendura” bazuar në Kodin e Procedurës Administrative, neni 66 pika 1, ku përcaktohet se: “Nëse organi publik që zhvillon procedurën përballet me një çështje, zgjidhja e së cilës është parakusht për zgjidhjen e procedurës dhe që përbën një çështje ligjore të pavarur, për zgjidhjen e së cilës është kompetent një gjykatë ose organ tjetër, organi publik që zhvillon procedurën administrative pezullon procedurën deri në marrjen e një vendimi të formës së prerë për çështjen paraprake...” si dhe nenin 67 ku përcaktohet se: “Organi publik, që është kompetent për marrjen e vendimit përfundimtar, mund të marrë edhe vendime të ndërmjetme, kur gjykohet se mosmarrja e masave të caktuara do të shkaktonte një dëm të rëndë e të pariparueshëm mbi interesin publik, apo të drejtave ose interesave të ligjshëm të palëve.”

Për të verifikuar nëse organizatat që kanë mbështetur kandidatin janë të regjistruara sipas legjislacionit në fuqi, Sekretari i Përgjithshëm i është drejtuar me shkresën nr. 1618 prot., datë 25.04.2024 dhe nr. 1971 prot., datë 20.05.2024, Gjykatës së Shkallës së Parë të Juridiksionit të Përgjithshëm, Tiranë në referencë me përcaktimet e pikës 2 të nenit 4 të ligjit nr. 80/2021, ku përcaktohet se kjo gjykatë është përgjegjëse për administrimin e regjistrimit elektronik të organizatave jofitimprurëse. Me shkresën nr. 1618/1 prot., datë 07.05.2024 dhe nr. 1971 prot., datë 29.05.2024 është paraqitur informacioni nga Gjykata e Shkallës së Parë të Juridiksionit të Përgjithshëm konfirmon regjistrimin e organizatave të shoqërisë civile.

Për të verifikuar gjendjen gjyqësore të kandidatëve të cilët në dosjet personale kishin depozituar vetëm formularin e vetëdeklarimit të gjendjes gjyqësore, Sekretari i Përgjithshëm, me shkresën nr. 1619 prot., datë 25.04.2024, ka kërkuar nga Drejtoria e Përgjithshme e Burgjeve verifikimin e gjendjes gjyqësore për kandidatët. Drejtoria e Përgjithshme e Burgjeve, me shkresën nr.1619/1 prot., datë 16.05.2024, konfirmon se 4 kandidatë rezultojnë të padënuar ndërsa 1 kandidat rezulton me shënime në sistem.

Për të vërtetuar vjetërsinë në punë, sipas përcaktimeve ligjore, jo më pak se 15 vite pune në profesion si jurist, Sekretari i Përgjithshëm, me shkresën nr.1620 prot., datë 25.04.2024, i është drejtuar Institutit të Sigurimeve Shoqërore për informacion në lidhje me pagesat e kontributeve të sigurimeve shoqërore nga kandidatët. Me shkresën nr. 1620/1 prot., datë 07.05.2024, Instituti i Sigurimeve Shoqërore ka paraqitur të dhëna rreth kandidatëve nga viti 2012 deri në dhjetor 2023, për arsye se sistemi informatik i ISSH-së nuk ka të regjistruara të dhëna para këtij viti. Gjithashtu në shkresën e saj ISSH ka informuar Kuvendin se i ka kërkuar Drejtorisë së Arkivit Qendror informacion shtesë për periudhën përpara vitit 2012. Me shkresën nr. 1620/2 datë 16.05.2024 Drejtoria e Arkivit Qendror ka kthyer përgjigje pas verifikimit të kryer për kandidatët se për disa nga kandidatët nevojitet dokumentacion shtesë. Për këtë arsye Sekretari i Përgjithshëm, me shkresën nr.1713 prot., datë 02.05.2024, i është drejtuar Drejtorisë së Arkivit Qendror për informacion në lidhje me pagesat e kontributeve të sigurimeve shoqërore nga kandidatët me të dhënat përpara vitit 2012 duke i vënë në dispozicion informacionin shtesë të kërkuar nga DAQ. Me shkresën nr. 1713/1 prot., datë 10.05.2024, nr. 1713/2 prot., 13.05.2024 dhe nr. 1713/3 prot., 16.05.2024 Drejtoria e arkivit qendror ka kthyer përgjigje pas verifikimit të kryer.

Për të verifikuar përcaktimet e pikës 5 të nenit 149 të Kushtetutës së Republikës së Shqipërisë dhe nenit 152 të ligjit nr.115/2016, Sekretari i Përgjithshëm, me shkresën nr.1621 prot., datë 25.04.2024, i ka kërkuar Shërbimit Informativ Shtetëror verifikimin e kandidaturave.

Në vijim të kërkesës për informacion, të dërguar nga Sekretari i Përgjithshëm i Kuvendit, me nr. 1622 prot., datë 25.04.2024, nëpërmjet shkresës nr.1622/1 prot., datë 03.05.2024, Inspektorati i Lartë i Deklarimit dhe Kontrollit të Pasurive dhe Konfliktit të Interesave, shprehet se vetëm tre nga kandidatët për anëtarë të KLGJ-së dhe KLP-së që përfaqësojnë shoqërinë civile, kanë qenë subjekte deklaruese pranë ILDKPKI-së.

Për të verifikuar përcaktimet e pikës 5 të nenit 149 të Kushtetutës së Republikës së Shqipërisë dhe nenit 152 të ligjit nr.115/2016, Sekretari i Përgjithshëm, me shkresën nr. 1623 prot., datë 25.04.2024, i ka kërkuar Autoritetit Kombëtar për Sigurinë e Informacionit të Klasifikuar, verifikimin për kandidatët. Autoritetit Kombëtar për Sigurinë e Informacionit të Klasifikuar, me shkresat nr.1623/1 prot., nr.1623/2 prot., nr.1623/3 prot., nr.1623/4 prot., nr.1703/1 prot., nr.2165 prot., nr.2165/1 prot., datë 29.05.2024, ka sqaruar se për 6 kandidatë, në përfundim të procedurave të verifikimit, autoritetet verifikuese na informojnë se nuk disponohen të dhëna për përfshirjen e tyre në veprimtari që cenojnë sigurinë apo në aktivitete të kundërligjshme.

Për të verifikuar integritetin e kandidatëve, Sekretari i Përgjithshëm i është drejtuar Prokurorisë së Përgjithshme me shkresën nr. 1624 prot., datë 25.04.2024, duke i përcjellë formularët e deklarimit të plotësuar nga secili nga gjashtë kandidatët, sipas kërkesave të ligjit nr. 138/2015 “Për garantimin e integritetit të personave që zgjidhen, emërohen, dhe ushtrojnë funksione publike”, të ndryshuar,

për të kthyer përgjigjen në respektim të afateve ligjore. Nëpërmjet shkresës nr. 1624/1 prot., datë 30.04.2024, Prokuroria e Përgjithshme ka përcjellë kërkesën për plotësimin e të metave lidhur me plotësimin e kriterëve formale ligjore. Ndërsa për një kandidat ka përcjellë tre vendime për miratimin e rezultateve të verifikimit. Ndërsa me shkresat nr. 1624/2 prot., datë 10.06.2024, nr. 1624/3 prot., datë 10.06.2024, nr. 1624/4 prot., datë 10.06.2024, nr. 1624/5 prot., datë 10.06.2024, nr. 1624/6 prot., datë 10.06.2024 dhe nr. 1624/7 prot., datë 10.06.2024 ka përcjellë vendimin për mospranimin e kërkesës për verifikim të thelluar për kandidatët.

Për të verifikuar integritetin e kandidaturave, Sekretari i Përgjithshëm u është drejtuar me shkresën nr.1625 prot., datë 25.04.2024, prokurorive të rretheve: Prokurorisë së Apelit të Juridiksionit të Përgjithshëm, Prokurorisë së Posaçme Kundër Korrupsionit dhe Krimit të Organizuar, Prokurorisë Pranë Gjykatës së Shkallës së Parë të Juridiksionit të Përgjithshëm Tiranë, Prokurorisë Pranë Gjykatës së Shkallës së Parë të Juridiksionit të Përgjithshëm Durrës, Prokurorisë Pranë Gjykatës së Shkallës së Parë të Juridiksionit të Përgjithshëm Elbasan, Prokurorisë Pranë Gjykatës së Shkallës së Parë të Juridiksionit të Përgjithshëm Korçë, Prokurorisë Pranë Gjykatës së Shkallës së Parë të Juridiksionit të Përgjithshëm Berat, Prokurorisë Pranë Gjykatës së Shkallës së Parë të Juridiksionit të Përgjithshëm Kukës, Prokurorisë Pranë Gjykatës së Shkallës së Parë të Juridiksionit të Përgjithshëm Dibër, Prokurorisë Pranë Gjykatës së Shkallës së Parë të Juridiksionit të Përgjithshëm Fier, Prokurorisë Pranë Gjykatës së Shkallës së Parë të Juridiksionit të Përgjithshëm Gjirokastrë, Prokurorisë Pranë Gjykatës së Shkallës së Parë të Juridiksionit të Përgjithshëm Lezhë, Prokurorisë Pranë Gjykatës së Shkallës së Parë të Juridiksionit të Përgjithshëm Sarandë, Prokurorisë Pranë Gjykatës së Shkallës së Parë të Juridiksionit të Përgjithshëm Shkodër, Prokurorisë Pranë Gjykatës së Shkallës së Parë të Juridiksionit të Përgjithshëm Vlorë, duke kërkuar nëse për kandidatët e përcjellë janë regjistruar kallëzime/referime, janë regjistruar procedime penale, nëse kanë qenë ose janë persona në hetim, përfshirë vendimmarrjen e prokurorisë lidhur me hetimet, janë hetuar me masë sigurimi, përfshirë kopjen e vendimmarrjes së gjykatës për caktim mase, janë hetuar me vendim penal jo përfundimtar apo të formës së prerë për kryerjen e ndonjë vepre penale, si dhe përditësim për statusin aktual të hetimit, nëse janë në hetim. Me shkresat nr. 1625/1 prot., datë 02.05.2024, nr. 1625/2 prot., datë 03.05.2024, nr. 1625/3 prot., datë 07.05.2024, nr. 1625/4 prot., datë 07.05.2024, nr. 1625/5 prot., datë 07.05.2024, nr. 1625/6 prot., datë 07.05.2024, nr. 1625/7 prot., datë 08.05.2024, nr. 1625/8 prot., datë 09.05.2024, nr. 1625/9 prot., datë 09.05.2024, nr. 1625/10 prot., datë 10.05.2024, nr. 1625/11 prot., datë 10.05.2024, nr. 1625/12 prot., datë 10.05.2024, nr. 1625/13 prot., datë 10.05.2024, nr. 1625/14 prot., datë 13.05.2024, nr. 1625/15 prot., datë 14.05.2024 janë kthyer përgjigjet përkatëse.

Për të verifikuar përcaktimet e shkronjës “ç”, pikës 3 të nenit 152 të ligjit nr. 115/2016, Kuvendi i Shqipërisë, me shkresën nr.1712 prot., datë 02.05.2024 dhe nr. 2181 prot. datë 30.05.2024, ka kërkuar nga Drejtoria e Përgjithshme e Tatimeve nëse kandidatët kanë shlyer rregullisht detyrimet tatimore si dhe nëse organizatat e shoqërisë civile, janë regjistruar sipas përcaktimeve të shkronjës a), të pikës 4/1 të nenit 40 dhe nenit 42 të ligjit nr. Nr.9920, datë 19.5.2008 “Për procedurat tatimore në Republikën e Shqipërisë” të ndryshuar, cili është statusi aktual i këtyre organizatave dhe nëse ka ndryshim të statusit në cilën datë ka ndodhur ky ndryshim. Drejtoria e Përgjithshme e Tatimeve, me shkresën nr.1712/1 prot., datë 10.05.2024, shkresën nr.2181/1 prot., datë 04.06.2024 dhe nr. 2181/2 prot., datë 05.06.2024, ka kthyer përgjigje mbi verifikimet e kryera.

Pas administrimit të përgjigjeve të cituara më lart nga institucionet, Sekretari i Përgjithshëm i Kuvendit të Shqipërisë, me vendimin nr.6, datë 18.06.2024, ka shfuqizuar vendimin e pezullimit nr. 5, datë 25.04.2024 bazuar në neni 68 të Kodit të Procedurave Administrative.

Në përmbushje të detyrimeve ligjore të përcaktuara për Sekretarin e Përgjithshëm (pikat 2, 3 dhe 4 të nenit 35 të ligjit të sipërcituar), ky i fundit gjatë verifikimit ka konstatuar se disa kandidatë, të cilët sipas Komisionit të shoqërisë civile janë vlerësuar se plotësojnë kushtet kushtetuese dhe ligjore, kishin mangësi në dokumentacionin ligjor për të provuar plotësimin e këtyre kushteve.

Për sa më sipër, Sekretari i Përgjithshëm, bazuar në parashikimet e pikës 3 të nenit 35 të ligjit nr. 115/2016, u ka komunikuar këtyre kandidatëve në datën 22 Maj 2024, përmes postës elektronike personale të deklaruar në momentin dhe në dokumentacionin e aplikimit, mangësitë që kanë në dosje, duke vendosur një afat 5-ditor, në përputhje me afatin ligjor (brenda datës 28 Maj 2024) për plotësimin e dokumentacionit të kërkuar. Gjithashtu, në kuadër të vlerësimit të integritetit të kandidatëve, referuar përcaktimeve të pikave 3 dhe 5 të nenit 149 të Kushtetutës së Republikës së Shqipërisë, dhe në vijim të një praktike të konsoliduar në procedurat e mëparshme përzgjedhëse, Sekretari i Përgjithshëm i Kuvendit u ka kërkuar kandidatëve dorëzimin e deklaratës së interesave privatë duke saktësuar se, mos paraqitja e këtij formulari nuk është kusht skualifikues, por gatishmëria për plotësimin dhe dorëzimin e deklaratës do të vlerësohet me pikë ekstra në sistemin e pikëzimit që do të aplikohet për secilin kandidat.

Ndërkohë, disa kandidatë kërkuan shtyrjen e afatit për paraqitjen e dokumentacionit të kërkuar, dhe në këto kushte Sekretari i Përgjithshëm vendosi të shtyjë afatin e dorëzimit deri në datën 31.05.2024.

Me datë 05.06.2024, Sekretari i Përgjithshëm i Kuvendit i është drejtuar sërish me email kandidateve për të përcjellë dokumentacion plotësues. Afati i vendosur në dispozicion ishte deri me datë 10.06.2024.

IV. VERIFIKIMI I PLOTËSIMIT TË KUSHTEVE LIGJORE NGA KANDIDATËT

Sekretari i Përgjithshëm i Kuvendit, bazuar në pikat 2 dhe 3 të nenit 35 të ligjit nr.115/2016 “Për organet e qeverisjes së sistemit të drejtësisë”, të ndryshuar, siç u parashtrua më lart:

- ka verifikuar nëse dokumentacioni i kandidatëve është i plotë, duke kërkuar nga kandidatët plotësimet përkatëse;
- ka verifikuar dhe vlerësuar plotësimin e kushteve të parashikuara nga neni 149, pika 5, i Kushtetutës së Republikës së Shqipërisë dhe neni 152, pika 3, i ligjit nr.115/2016, si dhe të dokumentacionit që shoqëron shprehjen e interesit, të parashikuar në pikën 1 dhe 2 të nenit 56 të po këtij ligji;
- ka verifikuar kushtin ku përcaktohet se Kuvendi zgjedh anëtar të Këshillit të Lartë Gjyqësor nga anëtarët e organizatave të shoqërisë civile, të regjistruara sipas legjislacionit përkatës, të cilët punojnë në fushën e sistemit të drejtësisë ose të të drejtave të njeriut dhe që kanë zbatuar projekte në këtë fushë të paktën 5 vitet e fundit, duke ju referuar përcaktimeve të nenit 50, pika 5 të ligjit nr. 80/2021 datë 24.06.2021 “ Për Regjistrimin e Organizatave Jofitimprurëse” dhe shkronjës a) të pikës 4.1 të nenit 40 dhe neneve 42 dhe pikës 3 të nenit 43 ligjit nr. 9920 datë 19.05.2008 “Për procedurat tatimore në Republikën e Shqipërisë”

- ka verifikuar dhe vlerësuar kushtin ligjor të përvojës profesionale si jurist për jo më pak se 15 vjet, duke mbajtur parasysh dispozitën ligjore.

Pas njoftimit për plotësimin e dokumentacionit apo paraqitjen e dokumentacionit shtesë, në adresën elektronike të deklaruar nga kandidatët, si dhe pas përgjigjeve zyrtare të administruara nga institucionet publike, Sekretari i Përgjithshëm i Kuvendit konstaton si vijon:

A. KANDIDATËT QË PLOTËSOJNË KUSHTET LIGJORE

Plotësimi i dokumentacionit si dhe verifikimi dhe vlerësimi i plotësimin të kushteve ligjore për çdo kandidat është si më poshtë:

1. Kandidati Erion Fejzulla

Nga verifikimi i kryer në dosjen e kandidatit evidentohet se:

Kandidati është shtetas shqiptar, anëtar i Bordit dhe Drejtues Ekzekutiv i Qendrës për Politikën Publike, Shkencat Politike dhe të Drejtën që nga viti 2012.

Anëtarët e Bordit kanë provuar angazhimin e kandidatit në projekte dhe aktivitete brenda qendrës nëpërmjet dokumentacionit dhe materialeve të paraqitura. Gjithashtu sipas dokumentacionit të përcjellë, shoqata është regjistruar në përputhje edhe me përcaktimet e ligjit nr. 9920 datë 19.05.2008 “Për procedurat tatimore në Republikën e Shqipërisë” dhe legjislacionit për tatimin mbi të ardhurat, të ndryshuar.

Kandidati nëpërmjet vërtetimeve por dhe nëpërmjet dokumentacionit të përcjellë nga instituti i Sigurimeve shoqërore provon periudhën e angazhimit tij në punë si jurist në 15 vite. Nëpërmjet vërtetimit nga Dhoma Kombëtare e Avokatisë provohet se kandidati nuk ka ushtruar profesionin e avokatit të paktën 2 vitet e fundit, nuk është kandidat i propozuar nga avokatia ose trupa e pedagogëve, nuk është i dënuar me vendim gjyqësor të formës së prerë, nuk ka mbajtur funksione politike, nuk është bashkëpunëtor/informator/agjent i shërbimeve inteligjente si dhe në kohën e kandidimit nuk ka asnjë anëtar të familjes, sipas kuptimit të ligjit “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë”, si dhe të afërm të shkallës së parë që është anëtar në detyrë i Këshillit ose kandidat për anëtar.

Pjesë e dokumentacionit gjithashtu janë edhe deklaratat për dhënie të mbështetjes nga 3 organizata të shoqërisë civile.

Nga verifikimi i dokumentacionit të paraqitur si dhe dokumentacionit të përcjellë nga organet ligjzbatuese nga të cilat është kërkuar verifikim në mbështetje të pikës 5 të nenit 149 të Kushtetutës së Republikës së Shqipërisë dhe nenit 152 të ligjit nr. 115/2016 “Për organet e qeverisjes së sistemit të drejtësisë”, të ndryshuar, rezulton se kandidati Erion Fejzulla plotëson kushtet ligjore për t’u kualifikuar.

B. KANDIDATËT QË NUK PLOTËSOJNË KUSHTET LIGJORE

Nga dokumentacioni i paraqitur nga Komisioni i shoqërisë civile, sipas verifikimit të kryer nga ana e tyre, ka rezultuar se janë 6 kandidatë të cilët nuk plotësojnë kushtet ligjore për të qenë anëtarë të KLP-së.

Me shkresën nr. 1448/1, datë 17.04.2024 është përcjellë , sipas përcaktimeve të pikës 1 të neneve 156 dhe 156, edhe lista me kandidatët që plotësojnë kushtet ligjore të përcaktuara në nenit 152 të ligjit nr. 115/2016, si dhe vlerësimi i kryer nga Komisioni sipas përcaktimeve të nenit 34 të ligjit nr. 115/2016.

Pas paraqitjes së dokumentacionit në Kuvendin e Shqipërisë, sipas përcaktimit të pikës 1 të nenit 156 të ligjit nr. 115/2016, Sekretari i Përgjithshëm i Kuvendit të Shqipërisë mori në shqyrtim, në mbështetje të pikës 5 të nenit 149 të Kushtetutës së Republikës së Shqipërisë si dhe pikës 2 të nenit 35 të ligjit nr. 115/2016, kandidatët të cilët janë vlerësuar me pikë për kriteret profesionale dhe morale nga Komisioni i shoqërisë civile.

Sekretari i Përgjithshëm, bazuar në pikën 5 të nenit 149 të Kushtetutës së Republikës së Shqipërisë si dhe në pikën 7 të nenit 35 të ligjit nr. 115/2016, ka verifikuar dokumentacionin individual në dosje të secilit kandidat të vlerësuar me pikë dhe ka arritur në përfundimin si më poshtë:

1. Kandidati Altin Hazizaj

Nga shkresa e dërguar nga Drejtoria e Përgjithshme e Burgjeve rezulton se kandidati ka vendim nga Gjykata e Tiranës për një vepër penale.

Nga sa më lart kandidati nuk plotëson kushti e shkronjës ë), ku përcaktohet se: “nuk duhet të ketë qenë dënuar më parë me vendim gjyqësor të formës së prerë për kryerjen e një vepre penale”.

Gjithashtu konstatohet se në procedurën e zhvilluar në vitin 2017-2018 kandidati nuk ka deklaruar në formularin e dekriminalizimit dënimin e lartpërmendur. Si rezultat pas përfundimit të verifikimeve nga Prokurori është konstatuar se subjekti, sipas përcaktimeve të Kreut III, pika 3, ç), të vendimit të Kuvendit nr. 17/2016, ku thuhet se formulari përmban një rubrikë ku detyrimisht pasqyrohet se: “pasqyrimi i të dhënave të pavërteta, të paplota dhe të pasakta në të, passjellë përjashtimin e menjëhershëm dhe në çdo kohë nga kandidimi/zgjedhja/emërimi apo nga funksioni publik”.

Nga verifikimi dhe shqyrtimi i dokumentacionit të paraqitur në mbështetje të pikës 5 të nenit 147 të Kushtetutës së Republikës së Shqipërisë dhe nenit 54 të ligjit nr. 115/2016 “Për organet e qeverisjes së sistemit të drejtësisë”, të ndryshuar, kandidati Altin Hazizaj nuk plotëson kushtet ligjore për t’u kualifikuar.

2. Kandidati Altin Shegani

Nga shqyrtimi i dosjes së kandidatit ka rezultuar se mungonin dokumentet që provonin përmbushjen e kushteve ligjore. Konkretisht, kandidati nuk ka arritur të provojë nëpërmjet dokumentacionit të paraqitur regjistrimin e organizatës sipas legjislacionit përkatës, në referencë

të pikës 5, të nenit 50, të ligjit nr. 80/2021 “Për regjistrimin e organizatave jofitimprurëse”, të ndryshuar, të shkronjës a), të pikës 4.1, të nenit 40, nenit 42 dhe pikës 3, të nenit 43, të ligjit nr. 9920, datë 19.05.2008 “Për procedurat tatimore në Republikën e Shqipërisë”, të ndryshuar dhe legjislacionit në fuqi për tatimin mbi të ardhurat, të ndryshuar. Në dispozitat ligjore të referuara më lart, përcaktohet se për të provuar ushtrimin e aktivitetit të tyre, çdo organizatë jofitimprurëse mbart detyrimin për t’u regjistruar (nëpërmjet pajisjes me numrin unik të regjistrimit përkatës) dhe deklaruar periodikisht në administratën tatimore.

Në dosjen e kandidatit është paraqitur vetëm vërtetim nga Gjykata e Shkallës së Parë të Juridiksionit të Përgjithshëm, Tiranë ku provohet se kandidati është themelues dhe drejtor ekzekutiv i një organizate të shoqërisë civile. Sa më sipër kandidatit i është kërkuar plotësimi i dosjes me këtë dokument, i cili nuk është vënë në dispozicion.

Sa i takon plotësimin të kushtit që organizata e shoqërisë civile në të cilën kandidati është anëtar, duhet të ketë punuar në fushën e sistemit të drejtësisë ose të drejtave të njeriut dhe të ketë zbatuar projekte në këtë fushë të paktën 5 vitet e fundit, nëpërmjet email-it të dërguar në datë 22 Maj 2024 kandidatit i është kërkuar paraqitja e listës së projekteve/ veprimtarive të zhvilluara për të paktën 5 vitet e fundit në fushat e lartpërmendura si dhe dokumentacion provues, të certifikuar nga titullari i kësaj organizate. Kandidati nuk ka paraqitur dokumentacionin provues.

Si përfundim, nga verifikimi dhe shqyrtimi i dokumentacionit të paraqitur në mbështetje të pikës 5, të nenit 147 të Kushtetutës të Republikës së Shqipërisë dhe pikës 1, të nenit 54, të ligjit nr. 115/2016 “Për organet e qeverisjes së sistemit të drejtësisë”, të ndryshuar rezulton se kandidati Altin Shegani nuk plotëson kushtet ligjore për t’u kualifikuar.

3. Kandidatja Juelda Lamçe

Nga shqyrtimi i dosjes së kandidatës ka rezultuar se mungonin dokumentet që provonin përmbushjen e kushtit të përcaktuar në pikën 1 të nenit 54 ku përcaktohet se: “Kuvendi zgjedh 1 anëtar të Këshillit të Lartë të Prokurorisë nga anëtarët e organizatave të shoqërisë civile, të regjistruara sipas legjislacionit përkatës, të cilët punojnë në fushën e sistemit të drejtësisë ose të të drejtave të njeriut dhe që kanë zbatuar projekte në këtë fushë të paktën 5 vitet e fundit”.

Për përmbushjen e kushtit sa i takon regjistrimit sipas legjislacionit përkatës, në dosjen e kandidatës është paraqitur vërtetim nga Gjykata e Shkallës së Parë të Juridiksionit të Përgjithshëm, Tiranë ku provohet se është drejtore ekzekutive e një organizate të shoqërisë civile si dhe është paraqitur dokumentacioni që vërteton regjistrimin e organizatës sipas përcaktimeve të ligjit nr. 80/2021 “Për Regjistrimin e Organizatave Jofitimprurëse” dhe ligjit nr. 9920 datë 19.05.2008 “Për procedurat tatimore në Republikën e Shqipërisë” dhe legjislacionit për tatimin mbi të ardhurat, të ndryshuar.

Sa i takon përcaktimit se organizata e shoqërisë civile në të cilën kandidatja është anëtare, të ketë punuar në fushën e sistemit të drejtësisë ose të drejtave të njeriut dhe të ketë zbatuar projekte në këtë fushë të paktën 5 vitet e fundit, nëpërmjet emailit të dërguar në datë 22 Maj 2024 i është kërkuar paraqitja e listës së projekteve/ veprimtarive të zhvilluara për të paktën 5 vitet e fundit në fushat e lartpërmendura si dhe dokumentacion provues, të certifikuar nga titullari i kësaj organizate. Kandidatja nëpërmjet emailit nuk ka paraqitur dokumentacionin provues mbi

aktivizimin me organizatën në të cilën është anëtare por ka paraqitur kryesisht dokumente mbi aktivitete të zhvilluara me universitetin në të cilin është pedagogë.

Sa më lart, nga verifikimi dhe shqyrtimi i dokumentacionit të paraqitur në mbështetje të pikës 5, të nenit 147 të Kushtetutës së Republikës së Shqipërisë dhe pikës 1, të nenit 54 të ligjit nr. 115/2016 “Për organet e qeverisjes së sistemit të drejtësisë”, të ndryshuar, kandidatja Juelda Lamçe nuk plotëson kushtet ligjore për t’u kualifikuar.

4. Kandidatja Lefterije Lleshi

Nga shqyrtimi i dosjes së kandidatës ka rezultuar se mungonin dokumentet që provonin përmbushjen e kushteve ligjore. Konkretisht, kandidatja nuk ka arritur të provojë nëpërmjet dokumentacionit të paraqitur regjistrimin e organizatës sipas legjislacionit përkatës, në referencë të pikës 5, të nenit 50, të ligjit nr. 80/2021 “Për regjistrimin e organizatave jofitimprurëse”, të ndryshuar, të shkronjës a), të pikës 4.1, të nenit 40, nenit 42 dhe pikës 3, të nenit 43, të ligjit nr. 9920, datë 19.05.2008 “Për procedurat tatimore në Republikën e Shqipërisë”, të ndryshuar dhe legjislacionit në fuqi për tatimin mbi të ardhurat, të ndryshuar. Në dispozitat ligjore të referuara më lart, përcaktohet se për të provuar ushtrimin e aktivitetit të tyre, çdo organizatë jofitimprurëse mbart detyrimin për t’u regjistruar (nëpërmjet pajisjes me numrin unik të regjistrimit përkatës) dhe deklaruar periodikisht në administratën tatimore.

Në dosjen e kandidatës është paraqitur vërtetimi nga Gjykata e Shkallës së Parë të juridiksionit të Përgjithshëm, Tiranë ku provohet se është anëtare e Këshillit Drejtues të një organizate të shoqërisë civile, por referuar kërkesës të përcjellë nëpërmjet email-it të datës 22 maj 2024, për paraqitjen e dokumentacionit shtesë që provon se organizata e shoqërisë civile ka punuar në fushën e sistemit të drejtësisë ose të të drejtave të njeriut dhe ka zbatuar projekte në këtë fushë të paktën në 5 vitet e fundit, kandidatja nuk ka paraqitur dokumentacionin provues.

Si përfundim, nga verifikimi dhe shqyrtimi i dokumentacionit të paraqitur në mbështetje të pikës 5, të nenit 147 të Kushtetutës të Republikës së Shqipërisë dhe pikës 1, të nenit 54, të ligjit nr. 115/2016 “Për organet e qeverisjes së sistemit të drejtësisë”, të ndryshuar rezulton se kandidatja Lefterije Lleshi nuk plotëson kushtet ligjore për t’u kualifikuar.

V. VLERËSIMI I SHKALLËS SË PËRMBUSHJES SË KRITEREVE PROFESIONALE DHE MORALE, SIPAS NENIT 34 TË LIGJIT NR. 115/2016, NGA SEKRETARI I PËRGJITHSHËM I KUVENDIT

A. Verifikimi i kriterëve profesionale dhe morale, sipas nenit 34 të ligjit nr. 115/2016
Pas përfundimit të verifikimit mbi kushtet ligjore të kandidatëve (pikat 2-5 të nenit 35 të ligjit) Sekretari i Përgjithshëm vendosi për kualifikimin dhe vijimin e procedurës sipas ligjit, për 1 kandidat nga pesë kandidatë që u përcollën në listën e depozituar nga Komisioni i shoqërisë civile.

Sekretari i Përgjithshëm, në respektim të pikës 6 të nenit 35, zhvilloi më tej procesin e vlerësimit të shkallës së përmbushjes së kriterëve profesionale dhe morale të parashikuara nga neni 34 i ligjit nr. 115/2016, për secilin nga kandidatët e kualifikuar që përmbushin kushtet ligjore.

Neni 34 i ligjit nr. 115/2016 parashikon në mënyrë të detajuar kriteret morale dhe profesionale mbi bazën e të cilave do të bëhet vlerësimi i kandidaturave për Këshillin e Lartë të Prokurorisë, si më poshtë:

Meritat profesionale

- a) rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e arritura gjatë përvojave të tyre të punës, që lidhen me ushtrimin e funksioneve në fushën përkatëse që lidhet me veprimtarinë e institucionit për të cilën kandidon;
- b) vlerësimin e rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, pjesëmarrjen në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës;
- c) rezultatet gjatë studimeve në ciklet e arsimit të lartë;
- ç) ecurinë në punë dhe pjesëmarrjen në trajnimet profesionale dhe në kurse të tjera të certifikuara brenda dhe jashtë vendit.

Meritat morale

- a) reputacionin që gëzon kandidati në shoqëri dhe midis kolegëve;
- b) cilësitë morale, të tilla si: ndershmëria, përpikëria në ushtrimin e detyrave, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi, etika profesionale, përdorimi i të gjitha mjeteve të ligjshme për mbrojtjen me besnikëri të të drejtave të personave që përfaqësohen prej tij;
- c) angazhimin e provuar në ndjekje të kauzave të shoqërisë civile.

Meritat organizative, drejtuese dhe menaxheriale

- a) cilësitë e platformës dhe të vizionit që paraqesin;
- b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;
- c) aftësitë e komunikimit;
- d) aftësitë e të punuarit në grup dhe në mjedise multidisiplinore ose multikulturore;
- e) aftësitë e përfaqësimit në publik.

Kritere të përgjithshme

- a) mbajtja e titujve akademikë;
- b) kryerja e studimeve dhe trajnimeve afatgjata jashtë vendit;
- c) njohja e gjuhëve të huaja.

B. Vlerësimi sipas Komisionit të shoqërisë civile

Në bazë të nenit 35, pika 7, germa "c", të ligjit nr. 115/2016, në raportin për vlerësimin e shkallës së përmbushjes së kritereve profesionale dhe morale, Sekretari i Përgjithshëm mbështetet në procesin e zhvilluar, në raportin si dhe në dokumentacionin e përcjellë nga Komisioni i shoqërisë civile.

Në mbështetje të nenit 34 të ligjit nr. 115/2016, Komisioni shoqërisë civile harton një raport vlerësimi të shkallës së përmbushjes së kritereve profesionale dhe morale të kandidatëve dhe bën renditjen e tyre.

Në shkresën nr. 1448/1, datë 17.04.2024, Komisioni i shoqërisë civile ka paraqitur në mënyrë tabelore vlerësimin e kryer, që rezulton si më poshtë:

Nr	Kandidati	Vlerësimi
1	Altin Shegani	77.3 pikë
2	Erion Fejzulla	68.4 pikë
3	Altin Hazizaj	65.8 pikë
4	Juelda Lamçe	65.4 pikë
5	Lefterije Luzi	56.3 pikë

VI. VLERËSIMI I SEKRETARIT TË PËRGJITHSHËM TË KUVENDIT

Sekretari i Përgjithshëm i Kuvendit hartoi vendimin nr. 7, datë 18.06.2024, “Për miratimin e rregullave për vlerësimin e kritereve profesionale dhe morale të kandidateve për anëtarë të KLGJ dhe KLP nga radhët e avokatëve”. Në vendim është konceptuar një ndarje prej katër nivele meritash, të ndara në komponentë referuar nenit 34 të ligjit, si më poshtë:

Meritat profesionale: 4 komponentë, që përfshijnë:

- rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e arritura gjatë përvojave të tyre të punës, që lidhen me ushtrimin e funksioneve në fushën përkatëse që lidhet me veprimtarinë e institucionit për të cilën kandidon (6 pikë);
- vlerësimin e rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, pjesëmarrjen në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës (6 pikë);
- rezultatet gjatë studimeve në ciklet e arsimit të lartë (6 pikë);
- ecurinë në punë dhe pjesëmarrjen në trajnimet profesionale dhe në kurse të tjera të certifikuara brenda dhe jashtë vendit (6 pikë).

Totali i pikëve për këtë komponent është 24 pikë.

Meritat morale: 3 komponentë, që përfshijnë:

- reputacionin që gëzon kandidati në shoqëri dhe midis kolegëve (6 pikë);
- cilësitë morale, të tilla si: ndershmëria, përpikëria në ushtrimin e detyrave, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi, etika profesionale, përdorimi i të gjitha mjeteve të ligjshme për mbrojtjen me besnikëri të të drejtave të personave që përfaqësohen prej tij (10 pikë);
- angazhimin e provuar në ndjekje të kauzave të shoqërisë civile (6 pikë).

Totali i pikëve për këtë komponent është 22 pikë.

Meritat organizative drejtuese dhe menaxheriale me 5 komponentë, që përfshijnë:

- cilësinë e platformës dhe të vizionit që paraqesin (8 pikë);
- aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore (6 pikë);
- aftësitë e komunikimit (6 pikë);
- aftësitë e të punuarit në grup dhe në mjedise multidisiplinore ose multikulturore (6 pikë);
- aftësitë e përfaqësimit në publik (6 pikë).

Totali i pikëve për këtë komponent është 32 pikë.

Merita të tjera: 3 komponentë, që përfshijnë:

- mbajtja e titujve akademikë (8 pikë);
- kryerja e studimeve dhe trajnimeve afatgjata jashtë vendit (8 pikë);
- njohja e gjuhëve të huaja (6 pikë).

Totali i pikëve për këtë komponent është 22 pikë.

Totali përfundimtar për katër kategoritë e meritave që parashikon neni 34 i ligjit, është 100 pikë.

Sekretari i Përgjithshëm, pas konsultimeve të vazhdueshme me përfaqësues të organizmave ndërkombëtare (të cilët kanë qenë pjesë e rëndësishme e implementimit të reformës në drejtësi), në përputhje me përcaktimet e nenit 149, pika 5, të Kushtetutës së Republikës së Shqipërisë dhe pikës 6 të nenit 35 të ligjit nr. 115/2016, për vlerësimin e kriterit moral ka kërkuar nga kandidatët plotësimin dhe paraqitjen e deklaratës së interesave private para fillimit të detyrës. Sekretari i Përgjithshëm ka informuar kandidatët se gatishmëria në plotësimin e kësaj deklarate vlerësohet me 5 pikë mbi totalin e vlerësimit të kandidatëve me 100 pikë. Mosparaqitja e këtij formulari nuk përbën kusht për skualifikim.

Konkluzionet e Sekretarit të Përgjithshëm

Bazuar në shqyrtimin e dokumentacionit tërësor të dosjeve individuale të kandidatëve, në procesin dhe praktikën e Komisionit të shoqërisë civile, si dhe në raportin e vlerësimit të tij, duke marrë në konsideratë:

1. dokumentacionin individual të çdo kandidati, dokumentacionin plotësues dhe korrespondencën përkatëse;
2. mjetet procedurale në dispozicion të Komisionit të shoqërisë civile, për të vlerësuar përmbushjen e kriterëve morale dhe profesionale nga kandidatët, intervistat me kandidatët si dhe përbërjen e Komisionit të shoqërisë civile (neni 56 pika 11, të ligjit);
3. parashikimet e nenit 35 të ligjit, i cili i jep të drejtën Sekretarit të Përgjithshëm të kërkojë vetëm plotësimin e dokumentacionit që vërteton plotësimin e kushteve kushtetuese dhe ligjore pa zhvilluar seanca dëgjimore me kandidatët;
4. parashikimet e nenit 35, pika 6, që referojnë në nenin 34 të ligjit, për sa u takon kriterëve profesionale dhe morale të kandidatëve dhe vendimin nr. 7, datë 18.06.2024, të Sekretarit të Përgjithshëm, “Për miratimin e rregullave për vlerësimin e kriterëve profesionale dhe morale të kandidatëve për anëtarë të KLGJ dhe KLP nga përfaqësuesit e shoqërisë civile”,

Sekretari i Përgjithshëm i Kuvendit, në zbatim të nenit 149 të Kushtetutës së Republikës së Shqipërisë dhe nenit 35, pika 7, të ligjit nr. 115/2016, jep një vlerësim të tij të pavarur nga ai i kryer nga Komisioni i shoqërisë civile, por duke u mbështetur në procesin e zhvilluar dhe në raportin e përgatitur nga Komisioni.

Sipas dokumentacionit të përcjellë evidentohet se Komisioni i shoqërisë civile nuk ka përcjellë pranë Sekretarit të Përgjithshëm të Kuvendit të Shqipërisë ndarjen e pikëve sipas meritave të përcaktuara në nenin 34 të ligjit nr. 115/2016 për kandidatët, por ka paraqitur një tabelë me totalin e pikëve për secilin kandidat. Në këto kushte Sekretari i Përgjithshëm ka kryer vlerësimin e kandidatit referuar nenit të lartpërmendur dhe vendimin nr. 7, datë 18.06.2024, "Për miratimin e rregullave për vlerësimin e kritereve profesionale dhe morale të kandidatëve për anëtarë të KLGJ dhe KLP nga përfaqësuesit e shoqërisë civile" por duke u mbështetur në totalin e pikëve të vlerësuar nga Komisioni i shoqërisë civile.

Sekretari i Përgjithshëm i Kuvendit, në respektim të parashikimeve të nenit 149, pika 5, të Kushtetutës së Republikës së Shqipërisë dhe nenit 34 të ligjit nr.115/2016, vlerëson:

1. Kandidati Erion Fejzulla

Kandidati ka përfunduar ciklin 4-vjeçar të studimeve të larta në Fakultetin e Drejtësisë së Universitetit të Tiranës me rezultate të larta. Gjithashtu kandidati ka përfunduar Master European Rajonal "Në demokraci dhe të drejtat e njeriut në Evropën Juglindore" si dhe është aktualisht student i jashtëm PHD në Universitetin Leiden. Kandidati gjithashtu ka provuar nëpërmjet vërtetimeve angazhimit në një numër të lartë projektesh si ekspert ligjor që lidhen ngushtësisht me fushën e drejtësisë.

Platforma personale tregon një ide të përgjithshme të kandidatit për detyrat dhe rolin që do të luajë si anëtar i mundshëm i KLGJ-së.

Sekretari i Përgjithshëm vlerëson:

- Për meritat profesionale kandidati vlerësohet me 19 pikë nga 24 pikë maksimumi.
- Për meritat morale kandidati vlerësohet me 18 pikë nga 22 pikë maksimumi.
- Për meritat organizative, drejtuese dhe menaxheriale vlerësohet me 25 pikë nga 32 pikë maksimumi.
- Për meritat e tjera (komponenti për mbajtjen e titujve akademikë) kandidati vlerësohet me 16 pikë nga 22 pikë maksimumi.
- Për dorëzimin e deklaratës së interesave private, në përgjigje të kërkesës së Sekretarit të Përgjithshëm, kandidatja vlerësohet me 5 pikë (ekstra).

Në total kandidati vlerësohet me 83 pikë.

Në përfundim të procesit të vlerësimit, Sekretari i Përgjithshëm, bazuar në:

- argumentimin e mësipërm;
- vendimin nr. 7, datë 18.06.2024, të Sekretarit të Përgjithshëm, për pikëzimin e kritereve;
- vlerësimin me pikë të përmbushjes së kritereve profesionale dhe morale nga kandidatët, të kryer nga Komisioni i shoqërisë civile;

- nenin 35, pika 7, germa “c”, sipas të cilit Sekretari i Përgjithshëm vlerëson shkallën e përbushjes së kriterëve profesionale dhe morale nga secili kandidat;
- dokumentacionin e dosjeve individuale të kandidatit, konkludon se renditja sipas shkallës së plotësimit të kriterëve, siç është paraqitur në tabelën e vlerësimit të Komisionit të Shoqërisë Civile më lart, rezulton:

Nr	Kandidati	Vlerësimi
1.	Erion Fejzulla	83

VII. PËRFUNDIME

Në përfundim të këtij procesi vlerësimi, Sekretari i Përgjithshëm i Kuvendit, bazuar në nenin 149 të Kushtetutës së Republikës së Shqipërisë dhe në pikën 9 të nenit 35 të ligjit nr.115/2016, i dërgon komisionit të përhershëm përgjegjës për çështjet ligjore në Kuvend, brenda ditës së nesërme nga dita e hartimit:

- një listë me emrat e kandidatëve që plotësojnë kushtet e parashikuara nga Kushtetuta dhe ky ligj për të qenë anëtarë të Këshillit të Lartë të Prokurorisë;
- një listë me emrat e kandidatëve, të cilët, sipas vlerësimit të tij, nuk i plotësojnë kushtet e parashikuara nga Kushtetuta dhe nga ky ligj për të qenë anëtarë të Këshillit të Lartë të Prokurorisë (lista e kandidatëve të përjashtuar përmban emrat e tyre dhe arsyet e përjashtimit për secilin);
- një raport me shkrim, ku vlerësohet shkalla e përbushjes së kriterëve profesionale e morale nga secili kandidat, mbështetur në procesin e zhvilluar dhe në raportin e përgatitur nga Komisioni i shoqërisë civile.

Në zbatim të përcaktimit ligjor të nenit 35, pika 9, të ligjit nr.115/2016, listat dhe raporti i Sekretarit të Përgjithshëm të Kuvendit do të bëhen menjëherë publike në faqen zyrtare të Kuvendit.

